



Шоши мир ёх хорам дуң сохат эталдыман

Хасям сютсаяты хатдтан Пулңават вошан «Ямалица» кимет фестиваль верса. Хон па Овс мув экспертат, дизайнерат, округ туса сохат ёнтты хоятат яха ёхтыдысат, сохлад эталдысат. Кат хатл сыс лекцияйт, уйтантоп-сайт, мастер-классат мантсат, тынасты харат дарпитсайт, вератты харат рупитсат.

Округ тус хоятат «Там йисан тайты сохат («Современный костюм»), «Каш эталдыты по-райн думатты сохат» («Сценический костюм») па «Шоши мир ёх луңан тайты сохат» («Коллекция летней традиционной национальной одежды КМНС») номинацияйт хуват кассат.



Хор: Альбина Тырлина

Галина Пенчакувна Кечимова (ям пелакан) Елизавета опед пидан дойл. Касапсайн лауреат кимет степень вус.

Кашң номинацияйн йи хоят хулам рупата эталдытс: ёх хоят, нэ па няврэм сохат. Сохлад артадаты хоятатан вантсайт па пырысайт. Мет тусаңа па хорамаңа сохат ёнтам хоятат мойлаптасайт, ишаксайт.

«Шоши мир ёх луңан тайты сохат» номинацияйн мет ар – ур, ханты, саран ёх касас. Ханты нэңиилув ай пора элды аңкиладан, ун аңкиладан ёнтасты уталдайт. Сишан ход туса вератты хошлат. Тампуш касты хоятат кутан йи туса вератты ханты ху ус. Сит Владислав Ильич Кельчин, Ырвош курт элды. Лув па шеңк яма сак каратал, ернасат, нуй кувсят, вайт ёнтал, антапкедат верал. Муй нёхта – иса хошал.

Сохат эталдыты хоятат ернаслад па нуй сахлад ханшийн олтман усат, нэңат картэң сэвлад сюлемасат, катра сирн ёнтам охшамат оха понамтысат, кура думтам сэвам па нюки вайн шушамтысат, карэмисат.

Тампуш ханты хоятат элды туп кат нэ нох питсаңан. Сит Федосья Тимофеевна

Вылла па Галина Пенчакувна Кечимова. Лын аңки па эви, Муравленко вош элды. Федосья Тимофеевна касты хоятат кутан мет уна ювам хоят. Уйт дор тыдасян нийдьяң тада йил. Там хатл унты ёнтасал. Нэман дэсятм мойлапсайн юкантса. Галина Пенчакувна лауреат кимет степень вус. Волаң нэм шитас.

Мойң па вошаң хоятат кеша ун емаң хатл верса, волаң каш дэсятса. Тынасты харатан ар хорпи хорамат тынысайт, кашң хоят исипа молты лутас, талты ёхи ант манас. Вератты харатан няврэмат па ун хоятат хул сох, щашкан, сак, юх пидан рупитсат.

Там касапсайн сохат эталдытс кашң ханты нэңева мойлапса ясаң ясталув. Нын ход тус ёшаң хоятат, ханты улапсаев елды тулды. Елды пела ситы си хорам сохат ёнтаты, вантопсаята тутдыаты па эталдыты. Тумтак ёш, тумтак кур!

Альбина Тырлина ханшам потар



Хор: Альбина Тырлина



Хор: Альбина Тырлина

Шимдаң рут мир улапса туты ёх пирысайт

Там талэв Хон мувев ловатан арсыр рут хоят ияха пидаңа улты щира постаман ул. Щи ураңна Ямал мувеван улты шимдаң рут мират кеша касася лэщатыса, хота айлат ёх па хоттэл хоятат альсат хоты йис верат, монщат, доңалтопат елды тулат. Там тыдащ 17-мет хатадан нох питам хоятат нэмдал ястасайт.

«Душа народов Ямала» касасяин худам номинаций понман ул – хантэт, урат па ёрн ёх кутан. Ур ёх элты Евгений Худи нох питас. Ёрн ёх элты Татьяна Куболева мойдапса шитас. Хантылудв кутан Геннадий Кельчин пирыса. Лув хольмаң молтас тал ханты ясаң газет лэщатман рупитас па артан руц монщат ханты ясаң толмащсалды. Щишан, Овс мув шимдаң мир хоятат кутан шеңк яма уйтла.

Ямал мувеван ар ям хоттэлаң хоятат улдат. Лув няврэмдал вещьката энмалдат па шоши улапса елды тулат. «Семья народов Ямала» щиран хантэт элты Эдуард па Марина Сандринңан нох питсаңан. Ур ёх кутан Вячеслав па Вера Вануйто пирысайңан. Ёрн ёх элты Константин па Анастасия Калины олаң места шитсат.

Айлат ёх кеша «Лучший авторский проект» нэмпи касася лэщатыса. Щи щиран кат нэ нох питсаңан. Мужи вош элты Анастасия Тасьманова «Ханты ёнтотат» проект китмал. Анна Кукушкина Надым вош элты няврэмат кеша оляптаты нэпек лэщатмал – «Колобок на Ямале» нэмн понмал.

Тамащ касасяит кашң тал лэщатыдайт. Ин там пора унты сот молтас хоят мойдапсайт шитыдысат. Нын па папуш тамащ касасяята пилтащияты па шоши рут мирэв педа онтас вераты.

Иван Сандрин ханшам потар



Хор: Альбина Тырлина



Хор: Татьяна Паршукова



Хор: Альбина Тырлина

Олаң сот балл шитам няврэмат

Экзаменат мийман, олаң сот балл шитам няврэмат нэмдал ястасайт. Сит Пулңават, Губкинской вошңан, Надымской па Пуровской районңан элты ашкулдайн яма уталтыйм эвет па похат, олимпиадаятан нох питыдыйм няврэмат.

Худам няврэм литература яма масат, кат – химия, кат – история. Экзамен яма мийм айлат ёх кутан – Вероника Шабанова Пуровской район Уренгой вош олаңмет ашкуда элты. Лув химия предмет хуват 100 балл шитас. Ходна Губкинской вош «Высотка» нэмпи ашкулдайн уталтыйм пох Владимир Обуховский си предмет яма мас.

Шеңк яма уйтты гуманитарной предметат кутан кат эви па йи пох. Кат няврэм Пулңават вош лицей элты – Дарья Омельченко па Инал Маремуков. Ходна йи эви Надым вош элты. Сит – Виктория Леухина, мет торды предметат уталтыты хутмет ашкулдайн уталтыйс.

История хуват сот балл шитам няврэмат элты Пулңават вош лицей эви Иванна Норицына. Алла Мурзина уталтаты нэңан волаң баллат шитты нётса.

Округев хуват худам сёрс молтас няврэм ихосьяң класс уталтыты етшасат. Хасям экзаменат маты хасяс. Ин там ванан мийм предметат вантдайт. Ешаул сот балл шитам эвет па похат нэмдал ястадайт.

Кашң олаң этам няврэм па лувилал уталтам хоятлаң округ губернатор грант ох – сот сёрс солкува ёша паятлат. Тампуш олаң тал ветмет класс элты яртъяңмет класс унты сот балл шитам няврэмат уталтам хоятат ветъяң сёрс солкувайн сохаптадайт.

Альбина Тырлина ханшам потар



Хор: Зоя Куртимова

Тонты каварты вер альты ёхатсат

Ущ тыдащ ветхощъяңмет хатл элты хольмаң педа олаңмет хатл унты Канащ похалан «Тонты хот» семинар-практикум манал. Ёмвош округ па Пулңават элты тонты пидан рупитты тус ёшаң хоятат там уйтантопсая нэман вохсайт.

Уталтаты дарпитам харан хоятата потарда, хоты па муй порайн тонты унтан акатла. Альда, муй щиран щилосат сыстаптаты па кавартты мосал. Тонты элты верам хот лаңкты сохал талаңа йитаң ураңан, хоты тонты эватла па ёнтла.

Тамащ уталтыты хара ёхтам хоятат лув сэмлалан вантлэл, муй щиран ай тонты лопсыет элты хот лаңкты ун тонты сых тыйл. Верты верлаң хора па киная вулдайт. Щаха, пора хащтыйн, кина па хор хуват вантла, муй щиран тамащ пормас верса.

Там уйтантопса 10:00 щёс элты 18:00 щёс унты рупитал. Няврэмат яң тал элты па кашң ун хоят тохи яңхты верытал. Нэмолты тын сохаптаты ант мосал. Ёхтыдыяты, катра пора улам верат вантаты па уталтыяты!

Зоя Куртимова лэщатсалды

Хоятат яммалман рупитал

Александр Леонтьевич Нензелов Лорвош район доватан кашң куртан яма уйтла. Лув леккара па районной Дума депутата уд. Тунял Ас потты тыдащ соханты хатлатан юбилейной сэма питам хатлад постас – хутъяң пела вет тал довата йис.

Лув Ас потты тыдащ 28-мет хаталн 1970-мет талан сэма питас. Ащел, Леонтий Иванович – Ёханкуртаң ху. Антел, Дарья Алексеевна (эви опращ нэмад Пырысева) – Ямкурт нэ. Ултад хуват худ велпасман рупитсаңан па ар няврэм вещьката энмалсаңан: няд эви па йи пох.

– Ма нийдмет класс Васъёханов ашкудайн уталтыты етшаптасам. Щи юпийн Муживошн холна кат тал уталтысам, яңмет класс етшасам па мохты солтана армияя вусайм. Кат тал Узбекистан муван Туркестанской военной округ хоша солтана яңхсам, – Александр Леонтьевич потартас. – 1990-мет талн солтан элты ёхи ёхатсам па мохты рупатая доңксам. Рупата щира нумасты ант мосас, ванты, ма ащем ултал хуват худ велпасламан рупитас, ван кутан пландал тэчнаптысды. Айтэдн ащема нётсам, худ велты уталсам, щипан ащем пидан худ велты питсам.

Щиты лув лапат тал худ велпасламан «Горковской» рыбозавод хоша рупитас. Щалта щи юпина, Александра ийимел пидан номас понтсаңан елды уталтыты манты. Катңан 1997-мет тал элты па 2000-мет тал унты Пулңаватан медицинской училище хоша уталтысқан. Па мохты, елды уталтыты Тюмень воша медицинской академия хоша мантсатан. Щита холна аршак уталтыты мосас. Хут тал хащман, 2006-мет талн дын уталтыты етшасқан па леккар дипломңан ёша паватсаңан.

– Уталтыйм тумпина, ма Тюмень вошан холна рупитсам. Вошаң леккар хотатан няд тал леккар нётты хоят щира усам, – Александр ястас. – Семьяема нётты мосас. Дмитрий ун похиве щипораин ай, антимелан шависа па энмалса.

Щалта, 2007-мет талн кат ялап ун леккар-терапевтңан Муживоша рупитты ёхатсаңан. Щи талн кутап похиел сэма питас. Аратад, лув ийимел пидан няд няврэм тайлаңан. Ун похад Дмитрий, ашкула юпийн Ёмвошн уталтыс. Щита

Хон мувев доватан ар хоят леккар хотан рупитал. Леккарат тумпийн тохи холна ар щира рупитты хоятат лунтасман улдат. Кашң тал ущ тыдащ худмет лапат ох хаталан лув кешаел емаң хатл постада. Тампуш щиемаң хатл ущ тыдащ 21-мет хатла хойл. Щи кешаханты леккарев элты потар шуп понлүв.



Хор: Александра Нензелова

Хор: Сергей Попов



Александр Нензелов ийимел пидан.

Мет
одна худ
велпасламан
рупитас.

улты па рупитты хащас. Айшак отдал ёдан улдат, ашкудайн уталтылат. Кум шитман, щутщаты пораятан, лув семьяйл пидан унта яңхал. Няврэмдал

па ийимел рых вонцты тутлилды. Лэты арат худ велал па вой велты яңхал. Кат айшак похиелад – Кирилл па Макаре, энмам Ёханкуртада патан



Хор: Александра Нензелова

Хотэд хоятлад пидан.

вуйдылды. Ёдан, па щикут, Эвелина ай эвиел антиел пидан давласлаңан.

Александр Леонтьевич рупитты питмадан па елды уталтыты номас понас. Интернатура щира елды юшад тусды. Олаң талатан, 2007-мет тал элты па 2009-мет тал унты Александр Леонтьевич разъездной терапевт леккара рупитас, ай куртыета па вошата яңхас. Кашң куртан шоши хоятатан лавадса.

– Леккара рупитман мосал ивеван уталтыты. Йи лотан ал щиты омасты ант мосал, кашң тал ялап мутрайт па щират этлат. Щипна ма холна кимет леккар щира уталтысам, – рупатайл элты Александр Нензелов ястас. – Олңа эндокринолога па щие юпийн, 2011-мет талн фтизиатр леккар вертайты питсам. Ин па там порайн хатл сис стационар хоша терапевта рупитдам, па щикут поликлиника хоша эндокринолог приём па вердам. Шоши хоятдам яма уйтладам. Куртаң ёх, хой велпаслаты, вуды тащ шавиты ёх иса ёхтыдылат. Приём манталан лув вердал элты потарлат па муй номас тайлат, щит ищи манэм потарлат.

(Елды 5-мет лопасан лунталн)

Иван Сандрин ханшам потар

«Овс мув ольпат» касапсайн нох питам ханты няврэмат ханшам потрат па хорат понлув. Щи елпи, хащам лапатан 10-14-мет доват эвет па похат кутан, Охсар вошан улты няврэмқан олаң местая этам потрат па хорат поньдыслув. Там лапатан па уншак няврэмат китам рупатайт эталталдув. «Традиционная одежда» номинацияйн 15-18-мет доват няврэмат кутан Филипп Сязи (Питлор курт) кимет места уймал.

Касапсайн нох питам рупатайт

Муң ханты сохлув

Муң ханты сохлув – сәңк хорамат, сәңк хосамат па лыщкамат. Хой кус йи пус ханты сох сумтыдыяс, щит нәмоса порайна ан ярэмалды щимащ сох. Ал вантәнна – сох, щимащ ат лыщкам Овс мувна тәдыйи. Ханты сох, кус мола, аса па хорпи. Сахат па атат эват хорамсакат, щалта па эвтамдал мутраяңсакат. Каман хорпи эвтаматна сахлув хораматна ёнтлув. Щалта па суматты мосайлув каман хорпи кадаң сох эват верман улдат. Щи томпина холна сохлув хорамат. Хантэт сәңк хорамаң эдсохлад вердалад. Вантты умащ па кас!

Сах – щит ханты ныңат эдсох. Вутан мосал ар сах тайты. Касаң сах лув нәмад тайл – «ай сах», «тут сыд сах», «юх туты сах», «нюкни сах», «хорам сах», «каслыты сах», «хуйты сах», «лаңкасыты сах», «кул сах», «пунаң сах». Сах ар щирна ёнтла: «эвтам сах», «хансаң сах», «самарутка сах», «нави сах», «путы сах», «хулаң сах», «сук сах», «суов сах», «лопсаң сах», «лаңки сах».

«Ай сах» – щит касң хатл тайтыт сах. Имет «ай сахна» хот хощаңна яңхлат. «Ай сахна» ям яңхты па рупитты. «Тут сыд сах», «юх туты сах», «нюкни сах» – щит, идампа, ищи «ай сахат». Тут алты, йиңк па донщ туты, тут юх ләщатты па хот дыпи рупата верты порайна «ай сахна» яңхлат. «Нюкни



Хор: Филипп Сязи

сах» – карраи ювам сах. Хув тайман, касң хатад сумтыдыман па рупитман тайты эвалт нярры йил. Луң порайна нюкни сохна сәңк ям. Щимащ сохна найна ант хосамла, пелңайна ант илямла, ертна па тайла. Лув нәмаса хоты ант йил, сорал па тайла. Хув тайты эвалт щиты йил. «Хорам сах» – щит эвтам сах, иулты хансы тайл. Вантты умащ. Имет «хорам сахат» емаң хатлат ураңна ёнтлат. Мохты ныла, хой хоты ёнтасал. Веритты имет сахлад ямас верлат. Щимащ сах холна мойлаты рахал. Сах тыныла ки тынал – кадаң, щит карра щиты тыныдыса. Сах умащ тайты. Элән хосам. Щи томпина холна сахат хорамат. Хантэт сәңк хорамаң эдсохлад вердалад.

Антап – щит ханты икет мос-ты пормас. Ёх нәңхи молщаң суматал – антап йирамтал.

Порха, нуй куващ, ернас суматал па антапыйл. Ёс пормаслад аса антпална тайдалды. Антап хоща кесәд щита, ләщтанәл, щёхрәл па щита. Верантты тахайна мола мосал – щита аса ул, ищи курамна аләмалды. Антап ар щирна верлат. Касаң ёх нәңхи лув щирална вердалды. Ма щимащ йи антап тайлам. Антап хоща лыптит улдат, щимащ лыптит дов эвалт па курты эвалт верлат. Лыптит кутна солтан похлат улдат. Лыптит па похлат вурты нуй лопсат хоща ёнтман

Сәңк ям мосты суматты моса хув тәлна – щит куващ ус. Куващ – щит сумтыдыла молщаң элты. Ёх нәңхи тайтыт. Касаң куващ лув яра нәмад тайл – пунаң куващ, ай куващ, няр куващ, хус куващ, хорам куващ, расәң куващ, нави куващ, хаттар куващ, самарутка куващ, хансаң куващ, няравой куващ. Куващ сох порайл хорпитат. Асса нәпалуват. Пунаң куващ ищки пораятна тайла. Ел хуви мантына молщаң элты суматла. Веритал хус куващ тайтыйи. Донщна ант ат питла. Хус куващ – щит



Хор: Филипп Сязи

улдат. Антап хоща сотап ул. Сотап юх эвалт па дов эвалт верлат. Щи томпина холна мув хор оңат эвалт верлат, ма щимащ атат ищи вантсам. Сотап лышина кесы ул. Ләщтан хот ищи антап хоща доял. Ләщтан хот – щит мосты моса. Кесән ки нисмал, хата кепа ант улдан, дохитты веритлән. Антап сасна аньщарат па кунсат, луват наңен атам эвалт савилат. Йис тәлна, хантэт хоща щимащ вер улмал: халащ педа манлан ки, мосл антап хощ эңхты, хадам нәңхи аньщарат сыялад ки – омтам лытытат хоща ванна ант йил. Антап – щит емаң па карра моса. Ям нәңхэт антаплад савиман па щалитман тайдаллад. Ханты ёх нәңхилув сәңк тусаңат па вераңат. Луват каман арат моса верлат. Верам антаплад педа щиты умащ вантты.

нярры ювамат, пунал холамат. Щитна щи хойтэт лавлат – няр куващ, хой лавал – хус куващ. Лохна яңхман тайла. Няр куващ тайлан ки – молщаңен ант морла. Донщ сайи тайла. Кувщат вердаят – асса нәпилув эвалт, ям суоват эвалт хордаят. Куващ сасна – расәт, кат пелкал эвалт дойидат. Хорам ураңна, хорам ат ул. Веритал щума ювал вертыйи. Вантапсәд ям ат ул. Щит хорам кувщат щиты верыдыдаят. Овас мувна улты нәңхэт, йис пораят эвалт, талан куващна яңхлат. Кувщат педа щиты умащ вантты. Вератты имет кувщат ямас верлат. Хорам щирна ёнтаслат. Щикем вантты ям.

Филипп Сязи ханшам потар,
10 класс.



Хор: Филипп Сязи

Хоятат яммалман рупитал

(Олаң шупал 3-мет лопасан лунталн)

Александр Леонтьевич Нензелов хоятатан яма уйтла. Хоят педа лув ям, самаң, иса муйн нётты верытал. Елды шоши хоятлал па шоши мувал педа нумасман ул. Щиты, 2020-мет талн номас понас, депутатат пирыты хара лувел ханшлтыты. Дорвош районэв хуват лув хоятатан яма уйтла, щипан районной Дума депутата мохты пирыса. Вет тал хаңас па Дорвош районэв Дума хоңа лув кимет пуш пирыса.

– Муя ма депутат вер тулэм, ванты, ма тата сэма питсам, энамсам, улдам па рупитлам, щипан шоши мир нуша верат уйтладам. Ма иса муй вердам, хоятлама нётты онтас тулам, – ханты леккарэв потартал. – Куртаң ёх улапса ямашак лэщатты мосал, аршак ялап хот омас-ты, щипорайн утал-тыйм айлат ёх ёхды йилат. Леккар хота рупитты ёхатты энамты няврэмата ищи иса нётлам. Депутат иты ма онтас вердам, лудн Дорвош районэван мирэв верат лэщатман ат улдат, ай куртаң ФАПат мосты порайн портунат па па отат ат тайсат.

Лув рупатайл яма уйтлалды па самаң тайлалды. Рупатайл ищи самаң тайла па лув элтэл иса ям ясаңан потарла.

2020-мет тал элты па 2022-мет тал унты Дорвош район поликлиника хоңа куңая понман ус. Щалта щипалатан коронавирной нэмпи атом муш мир доватан ус. Щипорайн Новый Уренгой воша шеңк лаварт мушаң хоятат артан тохи китыдысайт. Рупитты ёш ант тармас. Щипан округ доватэв элты леккарат тохи вохидысайт. Лув щита



Хор: Александра Нензелова

Ащел Леонтий Иванович па антел Дарья Алексеевна пилан.



Хор: Александра Нензелова

Рупата щипан ведпаслаты паната па яңхилдыл.

каматса тылащ «красной зона» хоңа хоятат яммалман рупитас.

Яма рупитты ураңна, Александр Леонтьевич ишканщип нэпекатан мойдыдыса: Благодарность Главного врача Мужевской ЦРБ, Благодарность Районной Думы МО Шурышкарский район па Благодарность Председателя Тюменской областной

Дума элты па па арсыр нэпекат.

Елды тумтака па вещьката лувел улты па шоши хоятата, шоши мувала онтас верты. Ям верат верты па яма рупитты ураңна ат уншак тынаң ишканщип нэпекатан, мойлапсаятан юканти!

Иван Сандрин ханшам потар

Рупатайт касасая китаты

Там ванан Овс мув шимлаң мир ёх департаментан «Муң рут ясаңан потарлүв» нётты хор вуты па хоятата эталтаты касаспа пуншса. Рут ясаңат шавиты, потарты па елды туты ураңан, тамащ касаспа кашң тал улдыл.

Тамхатл элты па унт дор тылащ хольмаң педа худмет хатл унты тащ верам рупата па заявка нэпек, там адрес хуват китты рахал: konkurs.yamal89@yandex.ru (посан постаты «Мы говорим на родном языке»).

Тампуш манты касаспа хут номинация тайл:

- «Единство народов — сила России»;
- «Формула здоровья по-ямальски»;
- «Эхо предков — голос будущего»;
- «Креативное в традиционном»;
- «Лайфхак на родном языке»;
- «Живое наследие ремёсел».

Хор вуты порайн, арыты, луңтар луңатты, потрэмиты па вантапса альты рахал. Щалта па ханты, ур, саран, ёрн ёх ясаңан потарты па рут мир сохан луматдыман улты. Китты рупата хуваталан йи минута элты нялмет шуп минута унты туп верты мосал.

Касаспа элты руңч ясаңан ханшам потар тата луңтаты: clck.ru/3U7тсТ, молты инщасаспа тайлаты ки, там номерат хуват потрэматы: +7(34922) 6-70-27, +7(34922) 6-70-21.

Щёхар тылащ нийлмет хатл Хон мувеван улты хоятат рут мир ясаңдала постаман ул. Касасая китам рупатайт щипа хатадан кина хуват эталтадайт. Тохи пилтащам кашң хоят ишакты нэпекан мада, мет ям рупата китам ёх мойлаптадайт.

Зоя Куртямова ханшам потар

Сорашак айкел моңатты ураңан

«Лух Авт» газета кашң лапат йи пуш этлдыл. Тухал ишан, ёхаттал унты талаң лапат хаңал. Щиперан, сорашак айкелат моңатты ураңан, нынан мосал «Лух Авт» поныдыты айкелат «ВКонтакте» па «Одноклассники» хоңа моңаттыты.

Щипураңан там QR-код мохты лоңаты, па муң верыдыты айкелдува ханшлтыяты. Кимет веран, айкел луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тыел-тохел поныдылэв, вантлэв – мата айкелат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасман елды тулэв, ханты мир ясең шавилэв!



ОБЪЯВЛЕНИЕ

Там QR-код хуват лоңаты па вантаты, муйсыр нётосайт СВО хоңа улты мохета мадайт. Щиптумпийн нэңдала, няврэмлада, аңкидала па ащилала ищи нётоса вуты рахал.



СЛУЖБА ПО КОНТРАКТУ В ВС РФ

Полная информация по телефону: +7 (902) 816-11-90, +7 (34922) 3-98-08

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА 6 700 000 Р

ЕДИНОВРЕМЕННАЯ ВЫПЛАТА 4 000 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Обучение:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ ПОДГОТОВКА
- ✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННАЯ ВЫПЛАТА
до 120 000 Р СУБСИДИИ НА КОМПЬЮТЕР

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОДВИЖАЮЩЕГО КОНТРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т.Р.



Шөпәрқи

Эй мәта латнә Төрәм Қон вәл. Қөләм пәх тайал. Ту пәхилнам, ту вөләт, вөләт, әй мәта латнә йастәл:

– Нәң, тақа, әнәлхә йәхтәх, ушә нә вәтә кима йәхтәх. Йәвәл-һол вәйтәх, панә йәвтытән. Қәйә қәйәхи һуләл қәлә көрхәл, панә ту тохинә нә тә вәйтәх.

Панә әнәлпи ләли сар йәвәт, һол. Ту һуләл әнәл тәрас қә қот аләм өвтыя көрәх. Һуләл әнәл тәрас қә әвинә нәқ вәйи. Күтәппи пәхәл һол-ләңк йәвәт. Ай тәрас қә қот аләм өвтыя көрәх. Ай тәрас қә әвинә һуләл нәқ вәйи. Ту айпи мата пәхәл ту ләңк күч йәвәт, қәлнам әнта өвәрнам мән, панә әнта қәлнам көрәх, қәйәхинә вули. Панә ту ләңклал кәнччәхә мәнәт.

Мәнәт, мәнәт. Ту әнәлпи пәхәл әнәл тәрас қә қота йәвәт. Айпи пәхәл, күтәппи пәхәл ай тәрас қә қота йәвәт. Ту айпи пәхәл, өс ту айпи, йәмат айпи, әй мәта қәра йәвәт. Йәңккәң туминт қөр. Ту



Хор: Людмила Айваседа

қөрнә тәми өпит өвтыя төвә көрәх, ту һуләл. Панә илнам тылмал тохи. Әнта қәлнам тыли? Панә мән, мән, чымләли, тохитләнә туминт пәм лүми қотәли йәхтәх. Ту пәм лүми қотәлия йәқә ләң. Тәм шөпәрқи тәт нәвриләл. Йәқә ләңмала шөпәрқи тәт йәчәнә нәвриләл. Панә пәсан туминт, йәмат туминт. Йәмхә учийә литәтат умты. Панә ту литәтат умты. Чай уч йә йиһт, панә мән. Чайә, ылә ымәлтә қә!

Шөпәрқи төвәнә йастәл:

– Нүң, өтә, пори вәртынка. Нүң мәнә, ма пырнә йүләм. Панә әй латнә туминт сүй учийә, әй сәңнам мәх тохәртахә



Хор: Людмила Айваседа

йәл. Әнтә тохәртахә йәл, туминт тарәм сүй сүймәхләл. Мәшмәта пәтәлитә сүй. Нүң ал қәһтәкинә. Йәх әйнам кәмнам нүрәхтәләт. Нүң ал нүрәхта. Кәм күч ливәтләт, әй мәта вәр пә әнтәм. Панә йәқә ләңләт. Өс ымәлләт, өс йәмат литәхә, йәһтәхә йәтылка, өс әй ту сүй өс әйпа сүймәхләл. Нүң өтә кәмнам ал нүрәхта. Йәх лүвә нүрәхтәләт. Йәқ илта күч нүрәхтәләт, әй мәта вәр пә әнтәм. Панә төвәнә йастәләт: «Тақа, өс кәмә әнтә мәнлүв. Тит қөләммәтхә өгталка, тит урашләлөйув». Шиты, омәсләт. Қөләммәтхә әй мәта латнә ти, әй төвәнә ту сүйхә йәх. Әй сәңнам қохәтхәл. Панә нүң ту латнә тә нүрәхта, қөләммәтхә туминт – өтә – сүйәл лирты питталка. Йәң вөккәң мата йәхнә катләхәллә, әй ту арит нүң мәнә, панә кәмә ливта. Кәм күч ливәтләт, ма ти йәвәтләт.

Панә ту қә төвә тәт кул. Аләң нәқ күч вәрәхләх, тәм мунт қәйәхи литәт уч вәрәнтәх. Пәсанәт учәт кәврәмәт, чайәт учәт. Нәқ кил, чай йиһт. Панә чымәл тәт вәл, панә мән. Ту йәқә йәвәтмал әй йәққәлнә һәхли:

– Нүң йә лүв, ай пәх, мәшмәта шөпәрқит-парәпәтнә һулән нәқ вәйи?

Ту ай пәх әй мәта өт пә әнтә йастәл. Ту мәта пырнә өс ту ләлихән һыңкәннат йәвәтхән. Ту пори вәртахә йәхмила. Ту йәх пори вәрәт.

Ти йәһтәхә, литәхә йәхәт, әйпа әпләң литәтәт. Панә ту пори вәрмилнә...

Чай сарпинә, ту пәхилнам Төрәм Қон йастәл:

– Қәта тәм атнә нүң... нәң ти имилән мүв сир һәһ лүвә вәрләт, қәлтөхил аләңкә кичә. Қәта қәйәхи йәмхә һәһ вәрәл.

Өс ту һыңлалнам мәнәт. Панә пыр қәтәл ту һәһһәт тә йәвәт. Әнәлпи пәхәл һәһ илә пәнчләмтәх, йастәл:

– Тәми тақа әлә вәлтә қәтәлнә литәхә.

Өс күтәппи пәхәл һәһ ләйләх:

– Тәми ай йимәң қәтләтнә литәхә қөты йәх.

Өс ту айпи мата пәхәл һәһ күч вәй, күч ләйләтә илә пәнчләмтәтәх, шунтукәли илә күч пәнчләмтәтәх:

– Ту нә қөтты? Тәм пайләх сиккәң һәһ, ар пәкәт вочәт-учәт, ту һәһнә, – панә йастәл, – вәт тақа!

(Еллы па ул)

Аграфәна Сопочина
нәпәка ханшсаллы



Хор: Людмила Айваседа

Тахар ики худам эви

(Олаң шупал № 24 лунтадн)

Эви нумасыйл: «Ант дэдам – атом, дэдам – ищи хорпи атом». Дэты щи омпсас.

Икел вой велты сонтамас. Мунты ищи опед верам иты, лапат хор сохан воцкасды.

Кутап опед ищи ант хошал. Лув нэмолты хоята ант нётас, лув па ант нётда.

Хор сохдал хоты саха верты, нэмолты хоятан щит ант уталгыса. Тахтэл еша пол-паңан лясалды, хота еша татлэмасды. Щалта кеши ус, сохал хотащ эватсалды па ёнтсалды. Щикут, ид оламтыйл ванттыя, ёшлал муй хорпет, курдал муй щиран манлат. Щиты сахал хотащ ёнтсалды.

Икел ёхаттадан, хайилдыйм питы вой сох, нови вой сох ант па татадмал.

Па щи вой сох тус.

– Сахен ёнтсэн, етшас?

– Етшас!

Сахал нох луматса па лаңкардал элты ид лакнамтас. Икел ким этдыйс. Ун наңк элты и нув сэвармас. Нувал яма версалды па тайн нёхарсалды. Услы па, имел каман, ун наңк тая нох тахарсалды:

– Улты ки ант хошдан, щита доя.

Ащел ики ёдан щи давласас, давласас. Хотэл кат шуңал ид щи питас.

Ай эвел педа ястал:

– Эвие, наңк яңха-сары ой каншты. Опеңадан ал ям тахая уйтантадсан. Ёхлы педа хун нумаслаңан.

Ай эвел щи манас. Эведа па ястал:

– Эвие, манты питдан ки, дор па пелка ёхаттэн унты пуши келэн нох ал яры. Муй щипкилэңки, муй вурщаклэңки, муй савнэңат уйтдан ки, холыена лапталан.

Эвел манас. Мантал кутан, дор па пелка ёхаттал унты, ащел ястам ясаң щиран, пуши келал нох ант ярсалды.

Щалта манты кутадан, муй вурщаклэңкет, муй щипкилэңкет увдат. Лув дэты омасал, войдал вана йилат. Хота ай нянь пулуйн войдал воцкасды, хота нянь шукийн парнадалды.

Щи манас, манас. Имолты порайн катра хота ёхтас. Вантдалды: йи ун наңк дойл. Наңк тая па опеңалал нох тахартамған. Нумасал: «Опеңалам паратсайған, ма ищи иламп паратлайм».



Хор: Альбина Тырлина



Мой улты хуватан усңан, дэототдал па щи холасат. Икел па щи велпаслаты манас. Имел ёдан хащас. Манты елпийн имел лапат хор сохан воцкасды:

– Ма ёхаттэм унты хорам сах ёнта.

Икел манам юпийн ий пиращ имилэңки ёхи доңас:

– Муй наң, эвие, верлан?

– Икеман сах ёнтты партсайм. Ант уйтдам, муй щиран ёнтты.

– Па наң, ма пал вусэма аңкартыя. Хойтаңан щита омаслаңан?

Ин эвие, пиращ ими пал вусала аңкармас, щита ай эвеңан арыман омаслаңан.

– Ким вохадан, ат нётдаңан, икен апцеңан.

Ким вохсалды. Дын сора пиращ имия нётсаңан, япсыена щи сохат татадсайт, нох версайт. Щи пиращ имен нэш, икел аңки улмал.

Пиращ ими ванта уйтдалды, похала муй хорпи сах мосал. Сахал щи яма ёнтса. Икел ёхатмадан, сахал нох луматсалды:

– Там сахен ма лаңкрэма тохи рахал, наң па манэма рахдан.

Щиты елды улты питсаңан. Моя ащел ики хоша мантсаңан. Лув ялап хотан омаса па ханты икев елды улты питас.

Олеся Хандыбина нэпека ханшсалды



Хор: Альбина Тырлина

Кев сыл вулэң ёх улапса лэрапман



Хор: Иван Сандрин

Ямал муев вулэң ёх хоща лув хув тэдан ёхтыдыты ура-тыйс. Ванты вер тайс, хоты сахат муң муевна хантэт па ур ёх вулы тащан касдыман яңхлат.

Ущ тылащ 10-мет хатадан «Ямал-потомкам!» Ассоциация куща ху Эдуард Яунгад па Кев сыл районан улты вулэң

Хащам лапатаң Хон муев ловат арсыр регионат элты ошаң па нумасты хоятат Пулцавта «Диалог парламентариев» форума ёхтыдысат. Щи кутан шимлаң рут мир хоятата нётап туты ху Григорий Иванович Дюкарев Красноярской край элты ус.



Красноярской край мойң ху Григорий Дюкарев (венш пелакан), Дмитрий Лаптандер па Эдуард Яунгад пилан вулэң хотэл хоятата мойлапса тусат.



Хор: Иван Сандрин

ёх кеша онтас туты ху Дмитрий Лаптандер АО «Совхоз Байдарацкой» 8-мет хантэт вулы тащ педа яңхсат. Щита Леонид Тайшин кущая ул. Щи тумпийн шоши тащ тайты хоят хоща па дарэмисат. Щита хотэл хоятлад кутан Антон Тайбери уна луңтасал.

Лув пилэдан Григорий Иванович яңхас па вантас, хоты хоятат вулы тащат шавиман улдат па муйн нётлайт.

– Муң Красноярской па Таймыр муватан улты кущайлува ищи ван кутан вулэң ёх хоща яңхты па инщасты мосал. Хоты лув улдат па муйн лувилал нётты мосал. Щиты улапса ямащак питал, – Григорий Дюкарев



Хор: Иван Сандрин

ястас. – Нын хощайн тэдыя нётапса вер рупатая вуйман ул. Молты порайн муң хощаев ищиты верты мосал.

Мойң хоятэв вулэң ёхлув пилан потрэмийс па лувилал инщасас, хоты улапсаед манал. Умашдыман вантас, муй хорпи хорам мувна шоши хоятлув улдат па хоты опрацдал тайты йис вер елды тутат.

Иван Сандрин ханшам потар



Хор: Иван Сандрин

Газета «ЛУХ АВТ»

Адрес редакции: 629003, ЯНАО, г.Салехард, мкр. Богдана Кнуянца, д. 1, каб. 106
+7 (34922) 4-68-63
E-mail: luh.avt@yamal-media.ru

Учредитель
Департамент внутренней политики Ямало-Ненецкого автономного округа (629008, ЯНАО, г.Салехард, пр-кт Молодёжи, д. 9, каб. 708)

Газета зарегистрирована
Управлением федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 199 тз
Подписные индексы:
на год – ПА700, на полугодие – ПР561

№ 25 (1328)
Газета вышла в свет 20 июня 2026г.
Подписано в печать 18 июня 2026г.
по графику: 16.00
фактически: 16.00
Газета выходит по субботам

Цена годовой подписки 88 руб.,
в розницу не распространяется

Издатель
Департамент внутренней политики ЯНАО (629008, ЯНАО, г.Салехард, пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-Ненецкий автономный округ, г. Салехард, мкр. Богдана Кнуянца, д. 1, каб. 106
Фактический адрес: 629007, Ямало-Ненецкий автономный округ, г. Салехард, ул. Чубынина, д. 39А

Генеральный директор
АНО «Ямал-Медиа»
Зулинова
Марья Андреевна

Главный редактор
Яковлева
Аллина Кирилловна